

樂律典第二十五卷

樂律總部彙考二十五

宋樂章六 明道元年章獻明肅皇太后朝會十五首

皇太后升坐聖安

聖母有子重光類禋聖皇事母感極天人百辟在庭九儀具陳禮容之盛萬國咸賓

公卿入門禮安

帝率四海承顏盡恭端闈肅設羣后來同玉佩鏘鳴衣冠有容英韶節步馨管雍雍

皇帝上壽酒崇安

天子之德形于四方尊親立愛化洽風揚聖母禕衣明君黼裳因時獻壽克盛朝章

上壽福安

盛禮煌煌六衣有光千官在位百福稱觴乾德慈仁邦斯淑祥如山之壽祐聖無疆

皇太后初舉酒玉芝

古今圖書集成
煜煜靈芝生于殿閣照映華棋粉敷玉麝感召元和光符聖期祥篇協吉百福咸宜

再舉酒壽星

現彼南極昭然瑞文騰光內位薦壽中宸太史駢奏升歌有聞軒宮就養億萬斯春

三舉酒奇木連理

王化無外坤珍效靈旁枝內附直榦來并羣分非一祺祥紹登至誠攸感海縣斯寧

羣臣酒行禮安

肅肅臨下有威有容循循事上惟信惟忠盛禮興樂示慈訓恭君臣協吉惟道之從湛湛零露晞
于載陽我有旨酒羣臣樂康既飲以德亦圖爾良永言修輔用協天常禮均孝慈樂合韶武至德
光矣鴻恩亦溥上和下濟華裔樂潛醴畢三行盛儀斯舉

酒一行畢作厚德無疆之舞

堯母之聖放勛爲子同心協謀柔遠能邇以德康俗以文興治斯焉象功罔不昭濟至矣坤元道
符惟聖就養宸極助隆善政翟籥紛舉笙鏞協應翱翔有容表德之盛

酒再行四海會同之舞

七德之舞四朝用康有如姬妣助集周邦威克厥愛居安不忘風旋山立濟濟皇皇
左秉朱千右
揮玉戚以象武綴以明皇德天子榮養羣臣述職四夷賓附罔不承式

降坐聖安

長樂居尊盛容有煒文王事親萬國歸美朝會之則邦家之紀受福于天克昭隆禮

治平皇太后皇后冊寶三首

皇帝升坐乾安

王化之始治由內孚時庸作命玉簡金書馨筦在庭其縱繹如天臨法展禮與誠俱

太尉等奉冊寶入門正安

辟儀臨拱丕命明敷鸞回寶勢鴻臚具瑤光禮成樂備德裕名芳肇基王化永懋天祥

皇帝降坐乾安

袞衣繡裳嚴威肅莊八音具張龔簾龍驤玉簡瑤章金書煌煌壽千萬年與天比長

熙寧皇太后冊寶三首

出入正安

煌煌鳳宇玉氣宛延天門嘯吻飛驂後先龍簋四合奏鼓淵淵母儀天下何千萬年

升坐乾安

峨峨繡宸旋佩以登如彼杲日凌天而升玉色下照疊疊繩繩猗歟大孝四海其承

降坐乾安

皇帝降席流雲四開蹕趨舜步下躡天墀恭授寶冊翠毛裴回明明純孝鴻釐大來

哲宗上太皇太后冊寶五首

皇帝升坐乾安

大矣孝熙帥民以躬奉承寶冊欽明兩宮萬樂具舉一人肅雍化由上始四海來同

降坐乾安

皇帝仁孝總臨萬方褒顯其親日嚴以莊龍袞翼翼玉書煌煌傳之億世休有烈光

太皇太后升坐乾安

總裁庶政擁祐嗣皇金書玉簡爛其文章衆歌警作筦磬將將保安四極降福無疆
降坐乾安

塗山之德涓涖之祥圖徽寶冊玉色金相管弦煒燁鐘鼓嚶嚶天之所啟既壽而昌

太尉等奉冊寶出入門正安

玉車臨御鳳蓋參麗奉承冊寶彌文盛儀抗聲極律助我孝熙天之所祐萬壽無期

紹興十一年發皇太后冊寶八首

皇帝隨冊寶降殿聖安

景祚有開符天媿昊誕毓聖神是崇位號星拱天隨祇嚴冊寶還御慈寧增光舜道

中書令奉冊詣皇帝褥位禮安

聲樂備陳禮容罔忒相維辟公虔奉玉冊皇則受之慕形于色既壽且康與天無極

侍中奉寶詣皇帝褥位禮安

祖啟搖光誕生明聖尊極母儀帝康作命寶章煌煌導以笙磬還燕慈寧邦家後慶

太傅奉冊寶出門聖安

肅肅東朝帝隆孝治猗歟丕稱寶冊斯備皇扉四闢導迎慶瑞德邁太任有周卜世

太傅奉冊寶入門聖安

靜順坤儀聖神是育懿鑠昭陳鏤文華玉樂奏既備禮儀不瀆導迎善祥翟車歸趨

太傅奉冊授提點官禮安

孝奉天儀信維休德發越徽音禮文靡忒永保嘉祥時萬時億歸于東朝含飴燕喜

太傅奉冊授提點官禮安

肅雍長樂克薦其慶河洲茂德沙麓啟聖是生睿哲蚤隆丕運欽稱鴻寶永膺天命

冊寶升慈寧殿幄聖安

禮行東朝樂奏大呂羽衛森陳簪紳式序雲幄邃巖宏典是舉天子萬年母儀寶宇

乾道七年恭上太上皇帝太上皇后尊號十一首

冊寶降殿正安

元祀介福孰綏孰將歸于尊親孝哉君王載鏤斯牒載琢斯章得名得壽如虞如唐

中書令侍中奉冊寶詣殿下正安

宗郊斯成交舉典冊汝輔汝弼威儀是力陳於廣庭迨此上日巍巍煌煌烏覩在昔

皇帝奉太上皇帝冊寶授太傅用禮安

奉太上
皇后同

儀物陳矣禮樂明矣天子戾止詔爾臣矣陟降維則恭且勤矣茫茫四海德教形矣

冊寶出門正安

天門九重蕩蕩開徹金支秀華垂紳佩玦或導或陪率履不越注民耳目四表胥悅

冊寶入德壽宮門正安

禮神頌祇福祿來下不有榮名孰緝伊嘏千乘萬騎魚魚雅雅皇扉洞開鞠躬如也

太上皇帝升御坐

降
同

穆穆聖顏安安天步有緝者儀以莫不舉天人和同恩澤洋普億載萬年爲衆父父

太傅奉太上皇帝冊寶升殿用聖安

大哉堯乎南嚮垂裳君哉舜也拜而奉觴繅藉光華鼓鐘鏗鏘三事稽首宋德無疆

太傅奉太上皇后冊寶升殿用聖安

乾元資始坤元資生允也聖德同實異名春王三朝典冊並行咨爾上公相儀以登

皇帝從太上皇后冊寶詣宮中用正安

維冊伊何鏤玉垂鴻維寶伊何範金鈕龍翊以贊御間以笙鏞誰敢不恭天子寶從

太上皇后出閣升御坐坤安

降同

帝膺永福功靡專有既尊聖父亦燕壽母怡怡在宮大典時受彤管紀之天長地久

內侍官舉太上皇后冊詣讀冊位用聖安

斂福于郊逢時之泰揭名日月侔德覆載自我作古域中有大永言保之眉壽無害

淳熙二年發太上皇帝太上皇后冊寶十一首

冊寶降殿正安

高明者乾博厚者坤以清以寧資始資生壽胡可度德胡可評願言從欲誕受鴻名

中書令侍中奉冊寶詣殿下正安

受命既長福祿既康如日之升如月之常追琢其章金玉其相天子萬年保其家邦

皇帝奉太上皇帝冊寶授太傅禮安

奉太上
皇后同

翠華之旗靈龜之鼓陳于廣宇相我盛舉來汝公傅肅乃儀矩母愆于素以篤多祐

冊寶出門正安

螭蟠青龍婉嬋象與其載伊何煌煌金書乃由端門乃行康衢于以榮親振古所無

冊寶入德壽宮門正安

惟天爲大其德曰誠惟堯則之其性曰仁迺文迺武得壽得名於萬斯年以莫不增

太上皇帝升御坐乾安

降同

天行惟健天步惟安聖子中立臣工四環民無能名威不違顏宋德宜頌漢儀可刪

太傅奉太上皇帝冊升殿聖安

奉寶同

天畀遐福允彰父慈維昔曠典我能舉之徐爾陟降敬爾威儀申錫無疆永言保之

太傅奉太上皇后冊寶升殿聖安

乾健坤從陽剛陰相迨茲受祉允也並況簾業在下儀物在上咨時三公執事無曠

皇帝從太上皇后冊寶詣宮中用正安

丕顯文王之德之純亦有太妣式揚徽音維冊維寶迺玉迺金伊誰從之一人事親

太上皇后出閣升御坐坤安

降同

重翟出房褱衣被躬委委佗佗河潤山容聖皇臨軒聖母在宮並受鴻名與天無窮

內侍官舉太上皇后冊詣讀冊位用聖安

舉寶同

珉玉玼璫蹕蹄精良既刻厥文亦鑄之章象德維何至靜而方輔我光堯萬壽無疆

淳熙十二年加上太上皇帝太上皇后尊號十一首

大慶殿發冊寶降殿正安

維天蓋高維地克承父尊母親天地難名顯名廣大建號安榮衍登壽遐闡繹皇明

中書令侍中奉太上皇帝冊寶太上皇后冊寶詣殿下用正安

二儀同尊兩曜齊光巍巍煌煌不顯亦彰寶茂號榮玉振金相於萬斯年既壽且昌

皇帝奉太上皇帝冊寶授太傅

太上皇后冊寶同

我尊我親承天之祉壽名兼美家國咸喜公傅秉禮寶冊有煒惟千萬祀令聞不已

冊寶出門正安

羽衛有嚴寶書有輝昭衍尊名鋪張上儀出其端闕由于康達比屋延瞻歌之舞之

德壽宮冊寶入殿門正安

南山之羣皇壽無窮太極之尊皇名是崇奉茲寶冊於皇之宮皇則受之於昭盛容

太上皇帝出宮升御坐乾安

降坐同

聖明太上天子有尊玉坐高拱慈顏粹溫震禁嘉承朝弁臚分盛禮緝典邃古未聞

太傅中書令侍中奉太上皇帝冊寶升殿用聖安

天錫伊嘏地效其珍誕作寶典奉于尊親爾公爾相爾恭爾寅協舉令儀適臻厥成

古今圖書集成
太傅中書令侍中奉太上皇后冊寶升殿用聖安

坤載有元乾行是順施生萬彙厥德彌盛翼翼母道贊我皇訓相維羣公奉典斯敬
皇帝從太上皇后冊寶詣宮中用正安

大矣母慈德備且純思古齊敬佐我皇文明章茂典金玉其音帝親奉之以翼以欽

太上皇后出閣升御坐用坤安

降坐同

天相慈皇慶臻壹闡徽柔內修壽與天齊既承皇歡載覲母儀懿典鴻名永綏多祺

內侍舉太上皇后冊寶詣讀冊寶位用聖安

有美英瑤於昭祥金爲策爲章並著徽音德聖而尊備舉彌文億載萬年永輔堯勳
紹熙元年恭上壽聖皇太后至尊壽聖皇帝壽成皇后尊號冊寶十四首

大慶殿發冊寶降殿正安

帝受內禪紀元紹熙欽崇慈親孝心肅祗迺建顯號迺藏丕儀發冊廣庭聲歌侑之

中書令侍中奉三宮冊寶詣東階下用禮安

鍾鼓交作文物咸備彤庭玉階天子是涖咨爾輔臣展采錯事輔臣稽首敢不率禮

冊寶出門正安

巍巍天宮洞開闔闔旗常歲蕤劍佩雜沓寶冊啟行法駕繼發鑠哉盛典快覩胥悅

冊寶入重華宮正安

仰止皇居九門載闢麗日重光非煙五色雷動萬乘雲從百辟咫尺重霄鞠躬屏息

至尊壽聖皇帝升坐乾安

降同

玉璽瑤編禮容畢具穆穆至尊華殿是御德配有虞紹唐授禹於萬斯年受天之祐

太傅中書令奉至尊壽聖皇帝冊升殿用聖安

慈皇天臨睟表怡怡欽哉聖子親奉玉卮鼇抃嵩呼歡浹華裔邇臣捧冊是恪是祇

太傅侍中奉至尊壽聖皇帝寶升殿用聖安

懇彼華玉篆魚鈕龍與冊並登咨爾上公詠以歌詩協之鼓鐘是陟是降靡有弗恭

太傅中書令侍中奉壽聖皇太后冊寶升殿用聖安

天祐皇家慶集重闈寶兮揚名冊兮流徽金支秀華盛容祗威詔我近弼相禮不違

太傅中書令侍中奉壽成皇后冊寶升殿用聖安

大哉乾元既極形容坤元德至寶與比隆寶冊並登勒崇垂鴻相我緝儀肅肅雍雍

皇帝從壽聖皇太后冊寶詣慈福宮用正安

涓辰協吉時維春元上冊三殿曠古無前思齊重闈積慶有源是尊是崇帝心載虔

壽聖皇太后出閣升坐坤安

降同

丕赫有宋三聖授受誰其助之繫我太母東朝受冊飲此春酒聖子神孫密侍左右

內侍官舉壽聖皇太后冊寶詣讀冊寶位用聖安

坤德益崇天壽平格慶流萬世子孫千億刻玉範金鋪張赫奕惟昔姜任則莫我匹

皇帝詣壽成殿壽成皇后出閣升坐坤安

降同

鞠育保護母道備矣密贊親傳德其至矣綵服來朝慈容有喜既受鴻名又多受祉

內侍官舉壽成皇后冊寶詣讀冊寶位用聖安

仰瞻慈闈登進寶冊惟時謦御祇率厥職曰壽曰名母兮兼得儷我尊父億載無極
紹熙四年加上壽聖皇太后尊號八首

大慶殿發冊寶降殿正安

德厚重闈沖澹粹穆何以名之惟慈惟福寶鏤精鏤冊鐫華玉物盛禮崇丕昭羣目
中書令侍中奉壽聖皇太后冊寶詣東階下禮安

於皇帝室休運貽孫重熙疊慶祇進號榮爰授茲冊必躬必親天子聖孝萬邦儀刑
冊寶出門正安

煌煌冊寶天子受之言徐其行肅展迺儀其儀維何劍佩黃麾鸞駕清蹕聳瞻九達
冊寶入慈福宮殿門正安

熙辰禮備濟濟雍雍言奉斯冊重親之宮宮帷既敞協氣感通皇儀親展壽考無窮
太傅中書令侍中奉壽聖皇太后冊寶升殿聖安

既肅琨庭載升金匱迺導迺陪威儀濟濟天步繼臨孝誠備矣聲容孔昭中外悅喜

冊寶詣宮中正安

璚輿彩仗祇詣慈宮寶冊前奉龍挾雲從言備茲禮于宮之中惟天子孝於昭祫容

壽聖皇太后出閣升御坐坤安

降同

懿典大冊陳儀邃深怡怡愉愉寶坐是臨重綵儼侍采展肅心三宮協慶永播徽音

內侍官舉壽聖皇太后冊寶詣讀冊寶位用聖安

寶冊既奉祇誦迺言仁深慶衍益顯益尊和聲協氣充溢乾坤並受伊嘏聖子神孫

慶元二年恭上太皇太后皇太后太上皇帝太上皇后尊號二十四首

冊寶降殿

天擁帝家澤流子孫三宮燕胥四海崇尊聲諧韶濩輝燭瑤琨維皇緝熙耀德乾坤

冊寶授太傅奉詣東階下

祖后重壽親闈並崇駢慶聯休申景鋪鴻疊璧交輝多儀煥叢億萬斯年福祿攸同

冊寶出門